



Në mbështetje të nenit 64.2 (a) dhe (b) dhe nenit 12, 128.2 i Ligjit nr.03/L-073 për Zgjedhjet e Përgjithshme në Republikën e Kosovës (LZP) dhe neneve 13, 20 dhe 29.2 të Ligjit nr. 03/072 për Zgjedhjet Lokale në Republikën e Kosovës (LZL), Komisioni Qendror i Zgjedhjeve (KQZ), me datën 09.03.2023, miraton këtë:

RREGULLORE NR. 01/2023 **REGJISTRIMI DHE FUNKSIONIMI I PARTIVE POLITIKE**

Neni 1 **Fushëveprimi**

Kjo Rregullore përcakton procedurat për regjistrimin e partive politike, refuzimin e kërkesës për regjistrim, ankesat, përmbajtjen e statutit të partisë, zgjedhjet e brendshme, pezullimin, çregjistrimin e partive politike dhe obligimet ligjore ndaj KQZ-së.

Neni 2 **Regjistrimi i partive politike**

1. Partia politike mund të paraqitet për regjistrim duke dorëzuar në Zyrën për Regjistrimin e Partive Politike dhe Certifikim (Zyra):
 - 1.1. Aplikacionin e plotësuar në formën siç është përshkruar në shtojcën I që përfshinë me sa vijon:
 - 1.1.1. Emrin, mbiemrin, adresën dhe numrin e telefonit të kryetarit të partisë;
 - 1.1.2. emrin, mbiemrin, adresën dhe numrin e telefonit të përfaqësuesit të autorizuar financiar të partisë;
 - 1.1.3. emrin, mbiemrin, adresën dhe numrin e telefonit të personit të autorizuar për të komunikuar në emër të partisë me KQZ;
 - 1.1.4. numrin e telefonit dhe adresën postare të zyrës qendrore të partisë;
 - 1.1.5. deklaratën e nënshkruar nga kryetari i partisë, për të respektuar dhe për t'iu përmbajtur kodit të mirësjelljes së partive politike;
 - 1.2. Statutin e partisë në përputhshmëri me nenin 11 të kësaj Rregulloreje, në formë fizike dhe elektronike;

- 1.3. Çfarëdo shkurtese apo shenje të partisë;
 - 1.4. Deklaratën e fundit financiar të partisë, që përshinë me sa vijon:
 - 1.4.1. dëshminë bankare për pagesën për regjistrim;
 - 1.4.2. deklaratën financiare të subjektit politik, ku tregohen donatorët që kontribuojnë për regjistrim;
 - 1.4.3. kontratën për shfrytëzim të hapësirës për zyrë apo dëshmi bankare për pagesa të qerasë;
 - 1.5. Datën e konventës/kuvendit themelues të partisë. shtojca II, që përmban deklaratën e përkatësisë etnike të cilën e përfaqëson iniciativa politike në qoftë se garon për vendet e garantuara;
 - 1.6. Emrin dhe adresën e së paku 500 përkrahësve të iniciativës politike të cilët banojnë në Kosovë dhe të cilët gjenden në listën përfundimtare të votuesve (LPV) shtojca III, në formë fizike dhe elektronike, që përshinë me sa vijon:
 - 1.6.1. a) Emrin dhe mbiemrin;
 - 1.6.2. b) datën e lindjes;
 - 1.6.3. c) adresën;
 - 1.6.4. d) numrin e telefonit;
 - 1.6.5. e) numrin personal;
 - 1.6.6. f) nënshkrimin;
 - 1.7. Programin politik të partisë që është paraqitur për regjistrim, në formë fizike dhe elektronike, të miratuar nga organi i saj më i lartë, ku paraqiten objektivat politike dhe aktivitetet e partisë, të cilat duhet të jenë në përputhje me Kushtetutën e Republikës së Kosovës dhe LZP.
2. Të gjitha shqyrtimet e aplikimeve për regjistrim të partive politike të dorëzuara në Zyrë do të pezullohen me rastin e shpalljes së datës së Zgjedhjeve nga Presidenti i Republikës së Kosovës. Shqyrtimi i aplikimeve për regjistrim të partive politike do të vazhdojë dhjetë (10) ditë pas certifikimit të rezultateve përfundimtare.

Neni 3 **Shqyrtimi i kërkesave**

1. Brenda tridhjetë (30) ditëve nga pranimi i aplikimit, Zyra e njofton KQZ për statusin e aplikimit, duke rekomanduar regjistrimin apo mosregjistrimin, ose duke sugjeruar dhe kërkuar korrigjime, përmirësime, plotësime apo ndryshime.

2. Zyra i shqyrton kërkesat brenda dhjetë (10) ditëve nga dita e pranimit të tyre.
3. Nëse kërkesa është e pakompletuar, apo nëse nevojiten të dhënat shtesë për shqyrtim të asaj kërkesë, Zyra do të kërkojë nga iniciativa për regjistrimin e partisë politike që të sigurojë korrigjime, përmirësimet, plotësimet apo ndryshimet brenda pesë (5) ditëve nga marrja e kërkesës nga Zyra.
4. Nëse Zyra e pranon si të kompletuar kërkesën e iniciativës politike që është paraqitur për regjistrim, e shpallë atë në gjuhët zyrtare në Kosovë - në faqen zyrtare të internetit të KQZ, brenda shtatë (7) ditëve.
5. Secili qytetar i Republikës së Kosovës mund ta kundërshtojë kërkesën në bazë të një ose më shumë arsyeve të parashtruara në nenin 4 të kësaj Rregullore, me dorëzimin e kundërshtimeve me shkrim në Zyrë, së bashku me çfarëdo dëshmie apo materiali që mbështetë kundërshtimet, brenda shtatë (7) ditëve nga shpallja e kërkesës nga paragrafi 4 i këtij neni.
6. Nëse nuk ka kundërshtime nga paragrafi 5 i këtij neni dhe Zyra konstaton se nuk ka arsye për refuzimin e regjistrimit nga neni 4 i kësaj Rregulloreje, Zyra brenda tre (3) ditëve i rekomandon KQZ regjistrimin e partisë politike dhe për këtë e njofton partinë.
7. Nëse ka kundërshtime sipas paragrafit 5 të këtij neni, Zyra e njofton iniciativën politike lidhur me kundërshtimin në afat prej 24 orëve nga pranimi i kundërshtimit dhe kërkon sqarime shtesë nga iniciativa politike në afat prej tri (3) ditë. Zyra e shqyrton kundërshtimin dhe sqarimet shtesë brenda tri (3) ditëve nga pranimi i kundërshtimit dhe i rekomandon KQZ miratimin apo refuzimin e kërkesës për regjistrim. Nëse KQZ e miraton kërkesën për regjistrimin e partisë politike, i njofton partinë dhe palët që kanë paraqitur kundërshtim për vendimin përmes Zyrës.
8. Pas vendimit të KQZ, Zyra menjëherë e njofton iniciativën politike të paraqitur për regjistrim dhe palët që kanë paraqitur kundërshtimin, lidhur me refuzimin e kërkesës së saj dhe arsyetimin për refuzim.
9. Njoftimi për refuzimin e kërkesës për regjistrim që i dërgohet iniciativës për regjistrimin e partisë politike, përfshin arsyet me shkrim për refuzimin dhe informon iniciativën për mosregjistrimin e partisë politike dhe për të drejtën e saj që të ankohet sipas nenit 8 të kësaj Rregullore.
10. Partia politike që përfshihet në regjistrin e partive politike, fiton statusin e personit juridik, me zotësi për të pasur pasuri, për të lidhur kontrata, për të paditur dhe për t'u paditur.
11. Aplikacioni për regjistrim të partisë politike mund të tërhiqet në çdo kohë para nxjerrjes së vendimit për regjistrim të partisë politike nga KQZ, duke e dorëzuar një kërkesë me shkrim

për tërheqje të aplikacionit, të nënshkruar nga të gjithë personat që kanë nënshkruar fillimisht (aktin e themelimit të partisë politike), shtojcën II.

Neni 4 **Arsyet për refuzimin e regjistrimit**

1. Me rekomandim nga Zyra, KQZ e refuzon kërkesën e iniciativës politike për regjistrim, nëse:
 - 1.1. Dokumentet e regjistrimit, duke përfshirë edhe statutin e partisë, nuk i plotësojnë kërkesat e kësaj Rregullore, ose janë në kundërshtim me Kushtetutën e Republikës së Kosovës dhe LZP;
 - 1.2. iniciativa paraqitet për regjistrim me emër, akronim ose simbol që, sipas vlerësimit të Zyrës, mund të nxisë urrejtje ndëretnike, religjioze apo gjinore;
 - 1.3. iniciativa paraqitet për regjistrim me emër, akronim ose simbol që është i njëjtë apo të ngjashme me simbolin e partisë të regjistruar më herët nga KQZ.
 - 1.4. nëse dy aplikacione për regjistrim të iniciativës politike me emër, akronim apo me simbole të njëjta apo të ngjashme, Zyra vendos se cila prej tyre ka të drejtë të regjistrohet me emrin apo simbolin e saj, duke marrë parasysh rrethanat e përgjithshme, si:
 - 1.4.1. kohën kur secila parti e ka dorëzuar kërkesën;
 - 1.4.2. kohën kur secila parti e ka përdorur së pari emrin ose simbolin e saj.

Neni 5 **Pezullimi i partive të regjistruara politike**

1. KQZ e pezullon nga regjistri partinë politike:
 - 1.1. Për mosmbajtjen e konventës/kuvendit të partisë politike, në pajtim me nenin 12 paragrafi 1 të kësaj Rregulloreje;
 - 1.1.2. me vendimin e KQZ për pezullim, partia politike obligohet që në afat shtesë prej 45 ditë të mbajë konventën/kuvendin e saj;
 - 1.2. nuk e ka informuar Zyrën në pajtim me nenin 12 paragrafi 5 të kësaj Rregulloreje, për mbajtjen e konventës/kuvendit së saj;
 - 1.2.1. me vendimin e KQZ për pezullim, obligohet partia politike që në afat shtesë prej 5 ditëve ta njoftojë Zyrën për konventën/kuvendin e mbajtur;

1.3. nuk i ka dorëzuar raportet e përditësuara dhe të kompletuara vjetore në pajtim me nenin 10 të kësaj Rregullore, deri më 31 janar.

1.3.1. me vendimin e KQZ për pezullim, përveç shqiptimit të gjobës, partia politike obligohet që në afat shtesë prej 20 ditëve nga dita e pezullimit, të kryej detyrimet e saj sipas nenit 10 të kësaj Rregulloreje.

1.4. Zyra, menjëherë pas pezullimit të regjistrimit të partisë politike, ndërmerr veprimet si në vijim:

1.4.1. Shënon pezullimin e saj në regjistrin e partive politike;

1.4.2. informon partinë politike me shkrim për hapat e nevojshëm për ta kthyer regjistrimin e partisë në gjendje të rregullt, si dhe për të drejtën e saj për të ushtruar ankesë kundër pezullimit nga neni 8 i kësaj Rregulloreje.

1.5. Partia politike, regjistrimi i së cilës është pezulluar, nuk certifikohet nga KQZ për të marrë pjesë në zgjedhje.

1.6. Pezullimi i regjistrimit të partisë politike mbetet në fuqi deri në ndonjë vendim nga PZAP, apo deri në plotësimin e kërkesave të Zyrës dhe të evitimit të arsyeve që kanë shërbyer si bazë për pezullim.

Neni 6

Vazhdimi i regjistrimit

Partia politike e regjistruar duhet të dorëzojë formularin për të vazhduar regjistrimin e saj, në formë elektronike ose në formë fizike të nënshkruar, jo më vonë se 31 marsi i vitit kalendarik, shtojca IV.

Neni 7

Çregjistrimi i partive politike nga regjistri

1. Me vendimin e KQZ, Zyra e largon partinë politike nga regjistri i partive politike, nëse:

1.1. Sanksioni penal kundër subjektit politik të regjistruar do të thotë çregjistrim i atij subjekti politik, siç përcaktohet nga gjykata;

1.2. partia politike e regjistruar, e cila në Zyrë nuk dorëzon formularin për ta vazhduar regjistrimin e saj jo më vonë se 31 marsi i vitit kalendarik. Në rast të dështimit për t'u reregjistruar në përputhje me këtë Rregullore, partia politike do të largohet nga regjistri i partive politike;

1.3. vullnetarisht është shpërndarë, në pajtim me statutin e saj;

- 1.4. ka qenë e pezulluar sipas dispozitave të nenit 5 të kësaj Rregullore dhe nuk ka vepruar sipas afatit të dhënë shtesë, paraprakisht të përcaktuar me vendimin e KQZ për pezullim;
2. Partisë politike e cila është çregjistruar nga regjistri i partive politike në pajtim me paragrafin 1 të këtij neni, i pushon statusi i personit juridik dhe konsiderohet e shpërndarë, kurse kalimi i pasurisë së saj bëhet në pajtim me statutin e partisë.
3. Nëse nuk ka marrëveshje të subjektit politik, ndarja e pasurisë bëhet nga gjykata kompetente.

Neni 8 **E drejta për ankesë**

Subjekti politik ose personi fizik, ka mundësi të ushtrojë ankesë kundër vendimit të KQZ për çregjistrim në Panelin Zgjedhor për Ankesa dhe Parashtresa (PZAP), brenda pesë (5) ditë pune pas publikimit të vendimit, me të cilin refuzohet kërkesa e saj për regjistrim, apo vendimit të KQZ për çregjistrim.

Neni 9 **Njoftimi për ndryshimet**

1. Partia e regjistruar politike e njofton Zyrën brenda pesë (5) ditëve të punës nga mbajtja e konventës/kuvendit, shtojca V, nëse ajo:
 - 1.1. Ndërron kryetarin, zyrtarin për financa të partisë ose anëtarësinë e organit të saj më të lartë ekzekutiv;
 - 1.2. për çfarëdo ndryshimesh sa i përket kryetarit apo zyrtarit për financa të partisë politike, Zyra njoftohet brenda pesë (5) ditëve të punës pas bërjes së ndryshimeve;
 - 1.3. ndryshon emrin e saj zyrtar, akronimin ose simbolin. Ndryshimet e tilla do të koordinohen paraprakisht me Zyrën, duke marrë parasysh kërkesat nga neni 4 paragrafi 1 i kësaj Rregulloreje;
 - 1.4. ndryshon statutin apo programin e saj politik;
 - 1.5. shpërndahet vullnetarisht;
 - 1.6. ndryshon identitetin, adresën apo numrin e telefonit të personit për kontaktim, përfaqësuesit financiar ose përfaqësuesit e partisë në çdo komunë ku partia është aktive;

- 1.7. hap apo mbyll një degë të partisë.
2. Partia e regjistruar politike, së bashku me njoftimin për çdo ndryshim të paraparë në paragrafin 1 të këtij neni, dorëzon edhe kopjen e procesverbalit të mbledhjes ose të procedurës me të cilën është miratuar ndryshimi, e cila duhet të jetë e vërtetuar nga kryetari i partisë.
3. Partia e regjistruar politike, së bashku me njoftimin për çdo ndryshim të statutit apo programit politik të partisë, i dorëzon Zyrës kopjen e statutit apo të programit politik të ndryshuar.

Neni 10 **Të dhënat e ndryshuara vjetore**

1. Partia e regjistruar politike i kompletton dhe ia dorëzon Zyrës të dhënat e ndryshuara vjetore, në formë elektronike ose në formë fizike të nënshkruar deri më 31 janar të çdo viti, duke identifikuar të dhënat e ndryshuara vjetore, shtojca V, si në vijim:
 - 1.1. Emrat dhe mbiemrat, adresat aktuale të kryetarit të partisë, të anëtarëve të organit më të lartë ekzekutiv, të personit për kontaktim, të përfaqësuesit financiar dhe të përfaqësuesit të partisë, në çdo komunë ku partia është aktive;
 - 1.2. adresat aktuale të të gjitha degëve lokale të partisë në Kosovë dhe jashtë saj;
 - 1.3. çdo ndryshim të statutit apo të programit politik të partisë, që është bërë gjatë vitit paraprak.
2. Zyra mund të lejojë zgjatjen e periudhës së dorëzimit të dokumenteve të parapara në paragrafin 1 të këtij neni, pas dorëzimit të kërkesës me shkrim të partisë së regjistruar politike për një zgjatje të tillë, nëse
 - 2.1. kërkesa është e arsyeshme, Zyra e njofton me shkrim partinë politike për zgjatjen e periudhës së dorëzimit të dokumenteve brenda tri (3) ditëve nga pranimi i kërkesës.
3. Afati shtesë i lejuar maksimal është dhjetë (10) ditë pune.

Neni 11 **Statuti i partisë**

1. Çdo parti e regjistruar politike ka statutin me të cilin rregullohen veprimet e partisë si tërësi, duke përfshirë edhe degët e saj.

2. Statuti i partisë së regjistruar politike përfshin, por nuk kufizohet:
 - 2.1. Procedurat përmes të cilave qytetarët mund të bëhen anëtarë dhe të pushojnë të jenë anëtarë të partisë, si dhe të drejtat dhe përgjegjësitë e anëtarëve;
 - 2.2. procedurat që duhet zbatuar për ndryshimin e statutit ose programit politik të partisë;
 - 2.3. procedurat që duhet zbatuar për zgjedhjen e kryetarit, të anëtarëve të organit më të lartë ekzekutiv ose të zyrtarëve të tjerë të zgjedhur të partisë;
 - 2.4. saktësimin në statut për ushtrimin e kontrollit të brendshëm financiar të tyre dhe, me qëllim të parandalimit dhe luftimit të praktikave korruptive dhe ngritjes dhe forcimit të menaxhimit financiar dhe transparencës, të zhvillojnë mekanizmat e kontrollit të brendshëm financiar;
 - 2.5. partia duhet të vendosë të ketë pagesë për anëtarësi apo të lirojë anëtarët nga pagesa e anëtarësisë;
 - 2.6. krijimin e një organi për zgjidhjen e kontesteve brenda partisë, lidhur me interpretimin e statutit;
 - 2.7. kalimin e gjithë pasurisë së mbetur pas shlyerjes së të gjitha borxheve, me rastin e shpërndarjes së partisë;
 - 2.8. rregulloren e punës që duhet zbatuar në kuvendet e rregullta dhe të jashtëzakonshme të anëtarëve të partisë, duke përfshirë edhe sigurimin e kuorumit, rendit të ditës dhe të vendimmarrjes;
 - 2.9. procedurat e shuarjes.
3. Ndryshimi në statutin e partisë së regjistruar politike, që nuk përputhet me kërkesat e kësaj Rregulloreje, është i pavlefshëm.
4. Statuti i partisë së regjistruar politike është dokument publik dhe publikohet, në të paktën në njërën nga gjuhët zyrtare në Kosovë, në faqen elektronike të partisë politike.
5. Secila parti politike e regjistruar është e obliguar të krijojë dhe mirëmbajë faqen e vet elektronike.

Neni 12

Zgjedhja e organeve të partisë politike

1. Partia e regjistruar politike, brenda gjashtë (6) muajve nga data e regjistrimit të partisë dhe pastaj së paku çdo dyzetetë (48) muaj, zgjedh kryetarin dhe organet tjera të partisë, në

mënyrë demokratike dhe transparente, ashtu siç e ka të rregulluar me statutin e saj të dorëzuar në KQZ.

2. Secili anëtar i partisë së regjistruar politike, në mënyrë të drejtpërdrejtë apo përmes delegatit të caktuar sipas procedurës përkatëse, ka votë të barabartë në të gjitha vendimet e marra nga Konventa/kuvendi¹, duke përfshirë zgjedhjen e kryetarit dhe të organit më të lartë ekzekutiv të partisë.
3. Partia e regjistruar politike, fton Zyrën për ta vëzhguar zgjedhjen e organeve të partisë në afat prej 5 ditë pune nga data e caktuar për mbajtjen e konventës, si dhe kuvendeve zgjedhore të degëve.
4. Partia e regjistruar politike njofton Zyrën në afat prej 5 ditë pune nga dita e mbajtjes së konventës zgjedhore të saj, për ndryshimet, listën e delegatëve pjesëmarrës të konventës së organizuar, dhe dorëzon në Zyre kopjen e procesverbalit dhe të gjitha materialet që kërkohen me formularin për njoftimin e ndryshimeve, Shtojca V, të cilat duhet të vërtetohen nga kryetari i partisë.
5. Zyra mund të kërkojë nga Kryeshefi Ekzekutiv i Sekretariatit të KQZ të autorizojë Zyrtarin Ekzekutiv të Komisionit Komunal të Zgjedhjeve (ZEKKZ) për vëzhgimin e kuvendit të degës së komunës përkatëse, i cili përgadit raportin për vëzhgimin e kuvendit zgjedhor, si në Shtojcën nr. VII
6. Partia politike mund të kërkojë afat shtesë për mbajtjen e konventës zgjedhore të partisë politike, nëse:
 - 6.1. Kërkesa për afat shtesë dorëzohet të paktën 10 ditë pune para afatit të fundit për mbajtje të konventës;
 - 6.2. kërkesa për afat shtesë dorëzohet në rastet kur mbajtja e konventës pamundësohet prej:
 - 6.2.1. gjendjes së emergjente shëndetësore të shpallur nga institucionet shtetërore;
 - 6.2.2. zgjedhjeve lokale;
 - 6.2.3. zgjedhjeve qendrore;
 - 6.2.4. fatkeqësive natyrore;
 - 6.2.5. gjendjes së jashtëzakonshme të shpallur nga institucionet shtetërore.
 - 6.3. Afati shtesë i kërkuar nuk duhet të jetë më i gjatë se gjashtë (6) muaj.
 - 6.4. Zyra shqyrton kërkesat sipas paragrafit 1 të këtij neni.

¹ Kuvendi/ konventa apo cilido organ tjetër i përcaktuar me statut të partisë politike, që ka mandat për zgjedhjen e organeve të partisë.

6.5. Nëse gjendja sipas paragrafit 6.2 të këtij neni vazhdon më gjatë se gjashtë (6) muaj, partia politike mund të dorëzojë kërkesë të re, e cila shqyrtohet nga KQZ.

Neni 13

Qasja në dokumentet e partive politike

1. Zyra përditëson dhe mirëmban dokumentet e partive politike, si në vijim:
 - 1.1. Programin;
 - 1.2. statutin;
 - 1.3. verzionet përfundimtare të të gjitha raporteve financiare vjetore të dorëzuara në Zyrë, së bashku me deklaratën e auditimit të subjekteve politike dhe regjistrin e donatorëve, sipas Ligjit për Financimin e Subjekteve Politike.
2. Qasja në dokumentacionin e regjistrimit të partive politike bëhet në përputhje me Ligjin nr. 06/L-081 për Qasje në Dokumente Publike, duke ruajtur konfidencialitetin e të dhënave.

Neni 14

Gjobat

1. KQZ sanksionon partitë e regjistruara politike për shkelje të kësaj Rregullore, bazuar në dispozitat e LZP-së dhe LFSP.
2. Pavarësisht pezullimit, partia politike obligohet të paguajë gjobën e shqiptuar.
3. Shqiptimi i gjobës nuk paragjykon asnjë sanksion penal që mund të zbatohet. Rastet të cilat mund të nënkuptojnë vepër penale, do të përcillen nga KQZ në Zyrën e Prokurorit të Shtetit.
4. Gjobat e mbledhura nga Zyra, barten në Buxhetin e Kosovës.
5. KQZ, sipas rekomandimit të Zyrës, i gjobitë subjektet politike për vonesën e dorëzimit të dokumentacionit të kërkuar, sipas nenit 9, 10 dhe 12 të kësaj Rregulloreje, sipas kriterit të përfaqësimit dhe afateve.
 - 5.1. Subjektet politike të cilat janë të përfaqësuara në Kuvendin e Kosovës, gjobiten për vonesën:
 - 5.1.1. 1-5 ditë, në shumën prej 500 €;
 - 5.1.2. 6-10 ditë, në shumën prej 1000 €;
 - 5.1.3. mbi 11 ditë, në shumën prej 1500 €.

- 5.2. Subjektet politike, të cilat nuk janë të përfaqësuara në Kuvendin e Kosovës, gjobiten për vonesën:
- 5.2.1. 1-5 ditë, në shumën prej 250 €;
 - 5.2.2. 6-10 ditë, në shumën prej 500 €;
 - 5.2.3. mbi 11 ditë, në shumën prej 750 €.

Neni 15

Dispozitat kalimtare dhe përfundimtare

1. Me hyrjen në fuqi të kësaj Rregulloreje, shfuqizohet Rregulla nr. 01/2013 për regjistrimin dhe veprimin e partive politike.
2. Pjesë përbërëse të kësaj Rregullore janë shtojcat:
 - shtojca - I Formulari i regjistrimit të partisë politike;
 - shtojca - II Formulari i konventës/kuvendit së fundit të partisë;
 - shtojca - III Lista e përkrahësve për regjistrim të partisë politike;
 - shtojca - IV Formulari për vazhdimin e regjistrimit të partisë politike;
 - shtojca - V Formulari i azhurnimeve vjetore të partisë politike;
 - shtojca - VI Formulari për njoftimin e ndryshimeve të partisë politike;
 - Shtojca - VII – Raporti për vëzhgim të kuvendit zgjedhor.
3. KQZ do të nxjerrë procedurë të veçantë për regjistrimin e partive politike.

Neni 16

Hyrja në fuqi

Kjo Rregullore hyn në fuqi pas miratimit nga KQZ.

Kryesues
Komisioni Qendror i Zgjedhjeve

Kreshnik Radoniqi